



Inatsisartunut ilaasortaq Hans Enoksen  
Siumut

## **Boot Campip aningaasalersornera pillugu § 37 malillugu apeqquteqaat 219**

Asasara Hans Enoksen

Apeqqutinnut qujallunga nalunaarutigisinnaavara taakku Inuussutissarsiornermut Sulisoqarnermullu Naalakkersuisoqarfimmut tusarniaassutigineqarsimmata, apeqqutimmi arlallit naalakkersuisoqarfimmut tassunga toqqaannartumik saaffiginnissutaammata.

Akissutit apeqqutit ataasiakkaat tamarmik ataanni allassimapput.

Naalakkersuisunut apeqquteqaat:

### **1) Meeqqanut immikkut pisariaqartitsisunut Naalakkersuisut aaqqissuussaat Boot camp qanoq aningaasalersorneqarpa?**

**Akissut:** Suliniummut aningaasartuutit Ilinniartitaanermut Ilimatusarnermullu Naalakkersuisoqarfiup (IIN-ip) peqataaffigisai kontop pingaernerup 40.01.08-p Ilinniartitaanermut pilersaarut kiisalu ilinniartitaanerup immikkut ittumik suliniutigineqarnera-nit atugassiissutaanit akilerneqarput. Suliniutip ilaa Inuussutissarsiornermut Sulisoqarnermullu Naalakkersuisoqarfiup (ISN-ip) peqataaffigisaa Piareersarfinnut kontomit 64.13.23-mit akilerneqarpoq. Suliniummut Kommuneqarfik Sermersuup peqataaffigaa pinartoqartillugu kommunip upalungaarsimasui akeqanngitsumik atorneqarsinnaatikkamigit, aammattaarlu sulisuminik suliniummi peqataatitaqarluni, pingaernerutillugu suliniutip assipajuinik siunissami aqqissuussissagunik ilisimasaqareerniassagamik. Ilanngullugu oqaatigineqassaaq peqataasut Bootcampernerminni ilinniartutut tapiissummik pisussaammata.

### **2) Aningaasat aningaasanit atorneqanngitsunit sorlernit Inuussutissarsiornermullu Naalakkersuisoqarfiup kontoinit sorlernit nuunneqarpat?**

**Akissut:** Aningaasanik nuutsisoqanngilaq, apeqqummullu siullermut akissummi taaneqartutut aningaasalersuinerne kontot pingaernerit atorneqarput. Tamanna apeqqutit arfernannut akissummi itisilerneqarpoq.

### **3) Boot camp-imut atatillugu akissarsiarititat qanoq amerlatigippat?**

12-10-2012  
Sags nr.2012-074528  
Dok. nr.1037051

Postboks 1029  
3900 Nuuk  
Tlf: +299 34 50 00  
Fax +299 32 20 73  
Email: iin@nanoq.gl  
www.nanoq.gl

**Akissut:** Boot Camp-ip ingerlanneqarnissaanut atatillugu IIN-ip suliffeqarfik Quantum Education ApS isumaqatigiissusiorfigaa. Boot Camp-imik isumaginnittup sulisuminik qanoq akissarsiaqartitsinera IIN-ip ilisimangilaa.

Quantum Education ApS-ip akissarsiaqartitaanik sulisut saniatigut ikuallattoornissamut aalajangersimasumik sap. ak. 12-ini upalungaarsimatitsineq 60.000 kr.-nit miss. akeqarpoq, taannalu IIN-ip akilissavaa. Apeqqummut siullermut akissummi taaneqartutut Nuummi Piareersarfiit sulisartik namminneq akilissavaat.

#### **4) Boot camp-imi qassit atorfeqartinneqarpat?**

**Akissut:** Misiligutigalugu suliniutip Boot Camp-ip ingerlanneqarnissaanut atatillugu IIN-ip suliffeqarfik Quantum Education ApS isumaqatigiissusiorfigaa, taamaattumillu "atorfeqartitaqarani". Taamaattoq, apeqqutit pingajuannut akissummi taaneqartutut, ikuallattoornissamut upalungaarsimasuutitap akissarsiai IIN-ip akilerpai. Quantum Education ApS sapaatip akunnerata ataatsip ingerlanerani inersimasunik 4-7-nik misiligutigaluni suliniummiititaqartarpoq. Sap. ak. 12-it ingerlaneranni, misiligutit suliniutip ingerlanneqarnerani, ilinniartitsisut qulingiluat Nuummiitineqarput allaffissorlorlu ataaseq Danmarkimiilluni. Piareersarfiit taaneqareersutut suleqatertik ataaseq aamma misiligutigalugu suliniummiitipaat.

#### **5) Aningaasaliissutinik atorneqanngitsunit sorlernit ilinniartitaanermut Naalackersuisoqarfik Boot camp-imut nuutsisimava?**

**Akissut:** Apeqqutinut 1-imut 2-mullu akissutini taaneqareersutut nuutsisoqanngilaq, tamannalu apeqqutit arfernannut akissummi itisilerneqarpoq.

#### **6) Boot camp-imut atatillugu qinnuteqaatit Aningaasaqarnermut Ataatsimiititamut qanga nassiunneqarpat?**

**Akissut:** Inatsisartut Aningaasaqarnermut Ataatsimiititaannut Boot Camp pillugu qinnuteqartoqanngilaq. Naalackersuisut ajuusaarutigaaat KNR-imi tusagassiortoq sivikitsumik paatsuungatitsimmat, tassa Naalackersuisup radiukku apersorneqarnermini oqaasii kinguneqarmata aningaasatigut tunngavigisat tusagassior tup kukkusumik nalunaarutigalugit. Maluginiaqquneqassaarli apersuinermit nal. ak. qassialunnguut qaangiutiinnartut tusagassior toq IIN-imi pisortaanermit telefonikkut ilisimatinneqarmat aningaasatigut tunngaviusut eqqortut pillugit, taamattaq suliniutip Aningaasaqarnermut Ataatsimiititaliami suliarineqarsimanginneranik. Tassunga ilanngunneqassaaq Naalackersuisut soorunami tusagassiorfiit kiffaanngissusillit pinngitsaalisinnaangimmatigit soorlu naqqiutit ingerlaannaq avammut nalunaarutigeqqullugit.

#### **7) Boot camp-imut aningaasaliissutit Aningaasaqarnermut Ataatsimiititap qanga akuersissutigai?**

**Akissut:** Apeqqummut 6-imut akissut qulaaniittoq innersuussutigineqarpoq.

#### **8) Boot camp suliffeqarfiuppat, taava suliffeqarfik kiia pigaa, imaluunniit Boot camp Naalackersuisoqarfiup pigaa?**

**Akissut:** Boot Camp misiligummik suliniutaavoq suliffeqarfunngitsoq. Namminersorlutik Oqartussat – naalackersuisoqarfiit akuusut marluk aqutigalugit – suliniummik Boot Camp-imik piginnittuupput Kommuneqarfik Sermersooq qanimut suleqatigalugu.

Inussiarnersumik inuulluaqqusillunga



Palle Christiansen